



ՀԱՄՈՒ ՍԱՀՅԱՆ

Չես ասի ոչ մի բառով

Ա՛խ, նորից «Բարի ճամփա»,
Ա՛խ նորից «Մնաս բարով»...
Մի տեսակ տազնապ կա, որ
Չես ասի ոչ մի բառով:

Գնում ես, չես էլ ասում,
Թե մեկ էլ երբ ես գալու,
Եկար էլ, ի՞նչ իմանամ
Ո՞ւմ մոտ ես մեղքդ լալու:

Ներիր ինձ, դու իմ բարի,
Իմ խելոք և իմ համառ,
Հարկադիր այս ծիծաղի
Եվ թաքուն լացի համար:

Գնում ես, էլ ի՞նչ ասեմ,
Սովոր եմ, կդիմանամ
Թող կուրծքս մի քիչ ցավի,
Որ սրտիս տեղն իմանամ:

Մի տեսակ տազնապ կա, որ
Չես ասի ոչ մի բառով,
Ա՛խ, նորից «Բարի ճամփա»,

Ա՛խ նորից «Մնաս բարով».